



Koleksi
Pantun
Majlis Rasmi



Mohd Amran bin Daud



Koleksi
Partur
Majlis Rasmi





Koleksi
Pantun
Majlis Rasmi



Mohd Amran bin Daud

JABATAN KEBUDAYAAN DAN KESENIAN NEGARA
KUALA LUMPUR
2024

Cetakan Pertama 2015

Cetakan Kedua 2024

JABATAN KEBUDAYAAN DAN KESENIAN NEGARA

Hak Cipta Terpelihara.

Tidak dibenarkan mengeluarkan mana-mana bahagian buku ini dalam apa jua bentuk atau cara sama ada elektronik atau mekanikal tanpa permohonan bertulis daripada Ketua Pengarah, Jabatan Kebudayaan dan Kesenian Negara.

Perpustakaan Negara Malaysia Data Pengkatalogan-dalam-Penerbitan

Mohd Amran Daud, 1968-

Koleksi Pantun Majlis Rasmi /MOHD AMRAN BIN DAUD.

ISBN 978-967-5552-51-9

1. Pantoums. 2. Malay poetry.

I. Judul.

899.231

Penyelaras :

Mohd Zin Mohd Sahid

Zuriah Mohamad

Penyelenggara:

Zuriah Mohamad

Penerbit:

Jabatan Kebudayaan dan Kesenian Negara

Aras 16,18,19,26,27,30 dan 34, Menara TH Perdana

No.1001 Jalan Sultan Ismail

50250 Kuala Lumpur.

Telefon : 03-2614 8200

Faks : 03-2697 0884

E-mel : penerbitan@jkkn.gov.my

Laman Sesawang : www.jkkn.gov.my



ISI KANDUNGAN

<i>vii</i>	Kata Alu-aluan
<i>1</i>	Pantun Pembuka Acara
<i>13</i>	Pantun Perpisahan
<i>21</i>	Pantun Bacaan Doa
<i>27</i>	Pantun Jemputan Ucapan
<i>33</i>	Pantun Jemput Makan
<i>41</i>	Pantun Pemberian Cenderamata
<i>47</i>	Pantun Persembahan
<i>53</i>	Pantun Perasmian Majlis
<i>59</i>	Latar Belakang Penulis



KATA ALU-ALUAN

Pantun merupakan puisi tradisional atau wadah sastera berbentuk lisan terawal masyarakat Melayu yang diamalkan secara turun-temurun dari satu generasi ke generasi berikutnya. Menurut Za'ba, pantun merupakan kaedah rangkapan yang tertua dan asalnya kepunyaan masyarakat Melayu sebelum penguasaan bacaan dan tulisan. Pantun dicipta sebagai suatu pengucapan untuk menyampaikan buah fikiran dan perasaan terhadap seseorang ataupun mengenai sesuatu perkara di samping bertujuan untuk menyindir, berjenaka dan memberi nasihat serta bersuka-suka. Ia dituturkan secara beritma dan sering kali diucapkan bersambut-sambutan. Pantun telah berasimilasi dalam pelbagai budaya Melayu di Nusantara dan berkembang pesat sehingga hari ini.

Berpantun ibarat landasan yang menjadi wadah komunikasi dalam kalangan masyarakat Melayu, selain menjadi alat hiburan, saluran pendidikan atau nasihat malah berperanan sebagai penyebar informasi dalam transmisi budaya. Ia merupakan manifestasi terbaik seni sastera masyarakat Melayu yang menggambarkan akal budi, pemikiran, sikap, kehidupan dan falsafah hidup yang dianuti. Pada tahun 2020, pantun telah mendapat pengiktirafan UNESCO sebagai Warisan Seni Budaya Tidak Ketara membuktikan seni warisan yang menjadi identiti masyarakat Melayu adalah penting dalam usaha pembangunan dan pembentukan jati diri masyarakat Malaysia.

Justeru, menzahirkan pantun secara lisan ke dalam sebuah buku merupakan inisiatif Jabatan Kebudayaan dan Kesenian Negara (JKKN) untuk melestarikan khazanah warisan luhur budaya Melayu sekali gus mengangkat kembali kesusasteraan Melayu agar tidak lapuk dek hujan tidak lekang dek panas.

Mohd Amran Mohd Haris
Ketua Pengarah
Jabatan Kebudayaan dan Kesenian Negara



Pantun Pembuka Acara

PANTUN PEMBUKA ACARA

Sekuntum melur idaman dara,
Kelopaknya jatuh di tepi hutan;
Salam dihulur pembuka bicara,
Moga kukuh tali persaudaraan.

Putuslah sudah tali sabut,
Tali direntang tepi padang;
Awal bismillah kata disebut,
Moga tuan ceria bertandang.

Mencari lokan waktu petang,
Dapat seguni angkat berdua;
Kami alu-alukan tuan datang,
Majlis kami sederhana sahaja.

Bunga gantang di Pasar Tamu,
Warnanya lain seperti bara;
Selamat datang para tetamu,
Dengan izin dimulakan acara.

Akar jelatang di rumah batin,
Menjalar tepian pepohon jati;
Selamat datang datuk dan datin,
Kunjungan kalian amat bererti.

Bawa rami ke Sungai Tekali,
Rami ditambat tepi kandang;
Nasib kami beruntung sekali,
Tamu hebat sudi bertandang.

Pucuk gelam pucuk semalu,
Pucuk pala daun berpilin;
Ucapan salam sambut tetamu,
Ikatan mesra kukuh terjalin.

Di Puncak Alam tumbuh jati,
Daunnya rapuh jatuh ke lurah;
Kunjungan tuan cukup bererti,
Terpahat kukuh dalam sejarah.

Cuaca redup di petang hari,
Ramai orang pergi berhuma;
Tuan sanggup datang ke mari,
Moga ikatan kekal selamanya.

Tumbuh pala di tepi perigi,
Tumbuh juga pohon petola;
Bersyukur kita kepada Illahi,
Dengan izin-Nya kita bersua.

PANTUN PEMBUKA ACARA

Simpan sigai tepian huma,
Sigai basah terkena renjis;
Tuan bagai bulan purnama,
Berseri cerah dalam majlis.

Penuh teritip perahu jalur,
Jalur warna corak berbekas;
Dengan tertib salam dihulur,
Majlis bermula serba ringkas.

Tepi permatang ada jerami,
Jerami berat bawa ke Juasseh;
Tuan datang ke majlis kami,
Bertambah erat ikatan kasih.

Manisnya cekur tumbuh di kali,
Petik daunnya petiklah berdua;
Mari bersyukur ke hadrat Ilahi,
Dengan kurnia-Nya kita bersua.

Hinggaplah tempua atas para,
Dahan sena dihinggap merbah;
Kita bersua menganyam bicara,
Dalam suasana penuh muhibah.

*K*utip lokan di Kuala Sepetang,
Lokan dibawa dengan takar;
Saya ucapkan selamat datang,
Kuntum mesra kembang mekar.

*K*eropok rangup di atas meja,
Keropok tenggiri nipis sekali;
Tuan sanggup tinggalkan kerja,
Demi menghadiri majlis kami.

*A*nak kelicap anak tekukur,
Anak belatuk mari diangkat;
Madah diucap kata ditutur,
Tuan disambut penuh adat.

*B*erarak awan di Pulau Gaya,
Pulau karang banyak kepiting;
Bak pahlawan segak bergaya,
Tuan seorang tetamu penting.

*T*anah gambut bukan padat,
Tanam kentang payah berisi;
Tuan disambut dengan adat,
Tuan diraikan penuh tradisi.

PANTUN PEMBUKA ACARA

Tanam peria tanamlah halia,
Halia disimpan dalam balang;
Hari mulia bulan pun mulia,
Kami meraikan tuan datang.

Sirih pinang dalam cerana,
Sirih junjungan dalam kain;
Hadir tuan besarlah makna,
Jadi ikutan tetamu yang lain.

Terbang kelicap dari tanjung,
Terbang melayang atas paya;
Sayang diucap kasih dijunjung,
Tuan seorang tamu istimewa.

Kibar bendera di pinggir kota,
Kota Matang letaknya pekan;
Salam sejahtera pemanis kata,
Selamat datang saya ucapkan.

Anak tempua si anak helang,
Hinggaplah mari atas titi;
Saya gembira tuan datang,
Majlis berseri mekar di hati.

Bukan gelam sebarang gelam,
Gelam tua kukuh sekali;
Bukan salam sebarang salam,
Salam mesra setulus hati.

Cuaca redup di petang hari,
Ramai orang pergi berhuma;
Tuan sanggup datang ke mari,
Moga ikatan kekal selamanya.

Tumbuh pala di tepi perigi,
Tumbuh juga pohon petola;
Bersyukur kita kepada Illahi,
Dengan izin-Nya kita bersua.

Kutip lokan di Kuala Sepetang,
Lokan dibawa dengan takar;
Saya ucapkan selamat datang,
Kuntum mesra kembang mekar.

Tepian paya bunyi berdentum,
Paya bemban di hujung taman;
Di bibir saya mesra berkuntum,
Meraikan tuan tamu budiman.

PANTUN PEMBUKA ACARA

Tanam peria tanamlah halia,
Halia disimpan dalam balang;
Hari mulia bulan pun mulia,
Kami meraikan tuan datang.

Pokok kemboja jangan ditarah,
Kemboja hutan cantik berseri;
Majlis sederhana makin meriah,
Apabila tuan datang ke mari.

Biji selasih sedap dimakan,
Mari ditatang bawa ke puri;
Terima kasih saya ucapkan,
Tuan datang majlis berseri.

Tanjung Tuan di hujung sana,
Tempat kera main di sawah;
Kunjungan tuan besar ertinya,
Bertaut mesra jalinan ukhwah.

Belilah telur di Pekan Machap,
Beli bambu berserta gamat;
Salam dihulur madah diucap,
Raikan tetamu penuh hormat.

Banyak lembah menuju pekan,
Pekan Matang membeli temu;
Salam sembah kata diucapkan,
Selamat datang semua tetamu.

Ikan haruan dibelit perambut,
Bawa seligi memburu toman;
Datang tuan mesra bersambut,
Harum wangi tali persaudaraan.

Kelapa puan di halaman puri,
Puri Diraja tempat keramat;
Sambut tuan datang ke mari.
Beriring doa ucapan selamat.

Tepi permatang tumbuh peria,
Tanah gambut tumbuh nenas;
Tuan datang bersulam ceria,
Kami sambut bersulam ikhlas.

Pohon pandan dibasuh akarnya,
Pohon temu susun berbaris;
Kedatangan tuan besar ertinya,
Sebagai tetamu penyeri majlis.

PANTUN PEMBUKA ACARA

Tepian paya tumbuhnya kesum,
Paya bembun di hujung taman;
Di bibir saya mesra berkuntum,
Meraikan tuan tamu budiman.

Daun jelatang uratnya kasap,
Daun pandan tepi halaman;
Selamat datang kata diucap,
Kepada tuan tamu budiman.

Bawa joran mengail jemuduk,
Bawah kemumu berenang bilis;
Tuan puan dipersilakan duduk,
Tuan tetamu penyeri majlis.

Kerat kuini keratlah bambu,
Keratlah juga ranting pala;
Saat begini memang ditunggu,
Bersua muka berbalas bicara.

Sudah matang bunga cempaka,
Waktu pagi kembang sekali;
Tuan datang berbunga ceria,
Harum mewangi taman hati.

Sukar dikerat batang jerami,
Di tepi sawah berlari puyuh;
Silaturrahim erat impian kami,
Moga ukhwah terjalin kukuh.

Bunga gantang bunga tanjung,
Cantik sekali si bunga sena;
Tuan datang tuan berkunjung,
Majlis kami cukup sederhana.


Jinak merpati memakan rumput,
Cantiknya bulu cantiknya warna;
Setulus hati kami menjemput,
Tuan tamu sungguh istimewa.

Marilah direntang akar rami,
Usah dicabut akar mempelas;
Selamat datang ke majlis kami,
Kami sambut dengan ikhlas.


Bukan batang sebarang batang,
Batang kelapa kukuh sekali;
Bukan datang sebarang datang,
Datang berjumpa tuan di sini.



PANTUN PEMBUKA ACARA



Banyak tuntung di pantai ini,
Banyak tamban juga parang;
Sangat beruntung kami di sini,
Menyambut tuan sudi datang.





Pantun Perpisahan

PANTUN PERPISAHAN

Banyak kelkatu malam hari,
Banyak kelicap di tepi hutan;
Kami mahu mengundur diri,
Salah silap harap dimaafkan.

Pelita malap di hujung biara,
Letak mari beralas daun;
Kalau tersilap tutur bicara,
Susun jari memohon ampun.

Jangan dipatah akar tuba,
Ambil daunnya ditenun sulap;
Masa berpisah sudah tiba,
Mohon ampun salah dan silap.

Menjaring parang juga bilis,
Menjaring kerapu amat susah;
Tuan datang penyeri majlis,
Tibalah waktunya kita berpisah.

Dalam dulang ada berangan,
Dalam guni banyaklah ubi;
Tuan pulang bawa kenangan,
Kami di sini terhibur hati.

Sudah matang bunga kenanga,
Waktu pagi kembang sekali;
Tuan datang berbunga ceria,
Harum mewangi taman hati.

Sungai Langat airnya tenang,
Tepi paya mengail belida;
Tuan diingat tuan dikenang,
Di hati saya terpisah tiada.

Bawah pokok taruk sampan,
Sampan reput tepi tualang;
Mana yang elok tuan simpan,
Mana yang buruk tuan buang.

Bukan dulang sebarang dulang,
Dulang suasa idaman peria;
Bukan pulang sebarang pulang,
Pulang membawa berita ceria.

Agak susah tangkap rerama,
Lebih susah tangkap merpati;
Kita berpisah hanya di mata,
Tidak terpisah di dalam hati.

PANTUN PERPISAHAN

Gelang suasa idaman puteri,
Cantik gelang di atas para;
Tiba masanya mengundur diri,
Janganlah tuan berasa hiba.

Lurusnya jalan di Negeri Perlis,
Dari Sabak singgah di Kuala;
Bila tuan meninggalkan majlis,
Hadirin sebak meruntun jiwa.

Tunduk padi di pinggir paya,
Tunduk semalu di tepi sawah;
Sudah menjadi resam dunia,
Kita bertemu untuk berpisah.

Kelapa puan semanis sirap,
Tumbuh juga di tepi perigi;
Kepada tuan saya berharap,
Sudi kiranya bertandang lagi.

Secangkir air mawar direnjis,
Pengantin elit tampak santun;
Sampai saatnya akhir majlis,
Saya selit serangkap pantun.

Pancang tiang biarlah kejak,
Tiang dibeli di Pekan Kuah;
Walaupun tuan datang sekejap,
Kami di sini sangat bertuah.

Tampak bersih cahaya bulan,
Sinar berlapis di perdu palas;
Terima kasih kepada tuan,
Serikan majlis dengan ikhlas.

Dari Kinta ke Negeri Kedah,
Bawalah uncang serta rotan;
Bukan dipinta kita berpisah,
Kita rancang Tuhan tentukan.

Buah delima dalam dulang,
Ambil sebiji makan bertiga;
Tibalah masa tuan pulang,
Kami di sini terkenang juga.

Naik kereta ke Tanjung Tuan,
Bawa seguni padi Malinja;
Bagaikan permata ilmu tuan,
Berkilau seri di mana sahaja.

PANTUN PERPISAHAN

Atas dahan tampak cahaya,
Dari jauh kembang melati;
Budi tuan besar maknanya,
Terpahat kukuh dalam hati.

Dalam bendang penuh jerami,
Sawah buram waktu senja;
Ketiadaan tuan siapalah kami,
Majlis suram tidak bermaya.

Sekarung padi beli di pekan,
Padi huma ditutupi jerami;
Sekalung budi kepada tuan,
Sudi terima pelawaan kami.

Pulau Sayak langitnya merah,
Pulau Lang memancing tanda;
Ramai khalayak majlis meriah,
Hadirin pulang sunyi melanda.

Akar temu tampak berpilin,
Bawah lembah subur selada;
Bila bertemu mesra terjalin,
Pabila berpisah sendu terasa.

Kenapa ditarah dahan getah,
Mengalir susu pekat sekali;
Kenapa susah kita berpisah,
Sampai waktu bertemu lagi.

Ombak tinggi kuat mendesah,
Penuh kuala buih berlendir;
Rasa di hati enggan berpisah,
Apakan daya suratan takdir.

Tanah gambut tanahlah kering,
Tanah kontang di tepi huma;
Datang disambut pulang diiring,
Tuan seorang tamu istimewa.

Simpan parang bawah sabut,
Simpan dulang tempat kering;
Tuan datang mesra bersambut,
Tuan pulang pastilah beriring.

Kota runtuh kota merekah,
Bawakan saya sebatang seligi;
Kalau sungguh kita berpisah,
Doakan saya bertandang lagi.

PANTUN PERPISAHAN

Biasan cahaya cantiklah warna,
Sinaran terik menimpa celagi;
Kenangan mesra waktu bersua,
Janganlah serik berkunjung lagi.

Dari Kota ke hujung tanjung,
Cuaca gelap di Tanjung Jara;
Majlis kita tiba di penghujung,
Tersalah silap jangan dicela.

Daya Bumi tersergam gagah,
Indah dipandang dari angkasa;
Perpisahan ini melakar sejarah,
Tuan dikenang diingat sentiasa.

Pinggir kota gelap gelemat,
Ada pelita dibawa mualaf;
Acara kita sudahlah tamat,
Maaf dipinta jika terkhilaf.

Pohon palas di tengah laman,
Siram perdunya hingga basah;
Sesudah puas kita bersalaman,
Sampai saatnya untuk berpisah.

Ada cempaka di tepi huma,
Ada semalu di tengah sawah;
Ada ketika kita bersama,
Ada waktunya kita berpisah.



Pantun Bacaan
Doa



PANTUN BACAAN DOA

Anak gurita di celahan batu,
Anak bilis berenang cermat;
Marilah kita memohon restu,
Moga majlis mendapat rahmat.

Burung undan di pinggir gua,
Terbang hinggap pagi hari;
Tuan diundang membaca doa,
Memohon rahmat dari Ilahi.

Sarat bahtera muatan lokan,
Lokan dipesan bersama suasa;
Salam sejahtera kami ucapkan,
Didoakan tuan sihat sentiasa.

Padi Mahsuri di dalam relung,
Padi Malinja memenuhi sawah;
Majlis berseri majlis terulung,
Bersama berdoa kepada Allah.

Ikan gerepuh berenang dekat,
Kakap merah tampak berbayang;
Doa bersimpuh mohon berkat,
Daripada Allah Maha Penyayang.

*M*elata sulur di tanah gambut,
Sulur bertam hancur tergilis;
Doa dihulur salam bersambut,
Tuan datang menyerikan majlis.

*B*anyak pohon banyak dahan,
Pohon ara dahannya dikerat;
Doa dipohon ke hadrat Tuhan,
Moga sejahtera dunia akhirat.

*A*da senduduk ada berangan,
Dalam kebun tumbuh merata;
Kami duduk menadah tangan,
Mohon diampun salah dan dosa.

*S*irih Langkat sirih bersusun,
Diberkas kecap di Pulau Jawa;
Tangan diangkat jari disusun,
Doa diucap meruntunlah jiwa.

*P*ucuk ara pucuk jelatang,
Pucuk pepaku di pinggir kali;
Doa dibaca dengan lantang,
Mohon restu daripada Illahi.

PANTUN BACAAN DOA

Intan berlian cantik berseni,
Sungguh indah amatlah keras;
Kesudian tuan datang ke sini,
Hanya Allah dapat membalas.

Dahan seraya dihinggap tempua,
Tempua hutan riuh dan hinggar;
Hajat saya menyampaikan doa,
Moga tuan khusyuk mendengar.

Emas bertatah idaman puteri,
Cantik puteri bersiram di kota;
Acara meriah amatlah berseri,
Makin berseri didahulukan doa.

Dari Bertam hingga ke Pahi,
Tiba malam kebaslah tangan;
Doa dipanjatkan kepada Ilahi,
Selawat salam buat Junjungan.

Burung tekukur atas dahan,
Hinggap juga di tepi lembah;
Puji dan syukur kepada Tuhan,
Semoga acara santai meriah.

Jalan serati jalan di hadapan,
Tepian dusun meminggir kali;
Setulus hati semurni harapan,
Doa disusun mohon diberkati.

Udang kara di lautan sana,
Mengaut bilis di tepian sini;
Mulakan acara dengan doa,
Barulah majlis lebih berseri.

Dalam cerana ada gambir,
Tepak sirih di hujung geta;
Sebening doa terucap dibibir,
Tanda kasih pada Pencipta.

Barang dibawa atas pangkin,
Barang berat disusun cermat;
Pimpinlah doa sebaik mungkin,
Mohon berkat mohon rahmat.

Di ranting ara banyak tempua,
Burung undan di ranting jati;
Mulakan acara dengan berdoa,
Doa dilafazkan sebening hati.

PANTUN BACAAN DOA

Bukan buih sebarang buih,
Buih kuala memenuhi kali;
Bukan boleh sebarang boleh,
Boleh berdoa syahdu sekali.

Alangkah sukar melalui titi,
Melalui juga pokok kekabu;
Alangkah bergetar rasa di hati,
Tuan berdoa menusuk kalbu.

Tanjung Tuan banyak selut,
Selut perigi banyaklah juga;
Cakap tuan manis di mulut,
Manis lagi menguntum doa.

Batu permata jernih sekali,
Idaman putera Pulau Jawa;
Air mata tergenang di pipi,
Penangan doa meresap jiwa.

Tanam halia tanam pandan,
Pandan muda daun berpulas;
Sungguh mulia dirimu tuan,
Membaca doa dengan ikhlas.

Kacip kekati bawa ke Goa,
Bawalah satu besinya berat;
Niat di hati hendak berdoa,
Mohon restu mohon hidayat.



Pantun
Jemputan
Ucapan

PANTUN JEMPUTAN UCAPAN

Membeli gamat tengah pekan,
Membeli batil simpan di biara;
Dengan hormat saya persilakan,
Tuan tampil memulakan bicara.

Batang pisang dibuat cacap,
Cacap disimpan tempat bersih;
Kesudian tuan untuk berucap,
Kami ucapkan terima kasih.

Padi huma di pinggir hutan,
Mari dipugar dengan cermat;
Ucapan mesra daripada tuan,
Kami dengar sehingga tamat.

Banyak siput banyak lipan,
Lipan bara memanjat pagar;
Tuan dijemput beri ucapan,
Kami sedia untuk mendengar.

Jangan diumpil dahan seraya,
Seraya hutan diketam kemas;
Tuan tampil segak bergaya,
Dengan ucapan cukup bernas.

Dari Perlis hingga Semporna,
Dari Pekan hingga ke Machap;
Agar majlis lebih sempurna,
Silalah tuan tampil berucap.

Permata nilam cantik buatan,
Nilam dibeli di Gelang Patah;
Pada tuan saya mempersilakan,
Berilah ucapan walau sepatah.


Bukan bara sebarang bara,
Bara arang jangan dituntun;
Bukan bicara sebarang bicara,
Bicara tuan berkias santun.

Buluh berongga di tepi kali;
Buluh kasap baharu bertunas;
Nampak di mata hebat sekali,
Tuan berucap sangat bernas.

Bakar jerami di pinggir hutan;
Hutan simpan dipagari betik;
Hajat kami menjemput tuan,
Beri ucapan walaupun sedetik.



PANTUN JEMPUTAN UCAPAN



Akar pulasan akarlah getah,
Akar rerusa memanjat kemiri;
Bicara tuan barang sepatah,
Kami berasa beruntung sekali.

Ambil kekati di dalam puan,
Dalam cerana ada kapurnya;
Kami menanti ucapan tuan,
Berkias makna sendat isinya.

Pokok ara berbuah lebat,
Ara masak digapai tangan;
Tuan bicara sungguh hebat,
Kami tepuk tanda sokongan.

Baik tuan menetam papan,
Bawalah sini sekeping dua;
Sekali tuan tampil ke depan,
Tampil berani melontar idea.

Merayap lipan di atas papan,
Bawah cerun menapak serati;
Lenggok ucapan penuh sopan,
Kami terpegun senang hati.

Tunggul jerami jangan dipugar,
Tunggul tajam di tanah pamah;
Telinga kami sedia mendengar,
Ucapan tuan penuh berhemah.

Banyak udang antara udang,
Tidaklah sama gerak kakinya;
Banyak orang antara orang,
Tidaklah sama tutur katanya.


Alang kepalang jalan diturap,
Jalan Langat keluknya ketara;
Padamu tuan saya berharap,
Kata semangat pemula bicara.

Pagar patah pagar berlapan,
Kayu pagar tidak melentik;
Tuan petah memberi ucapan,
Kami mendengar penuh asyik.

Pohon meranti berdaun lebar,
Hinggap kelicap seekor dua;
Yang menanti berasa berdebar,
Yang berucap selamba sahaja.




PANTUN JEMPUTAN UCAPAN



Pohon pauh atas permatang,
Pohon segar serkahnya dahan;
Memang jauh kami datang,
Demi mendengar ucapan tuan.

Hunjam kecap kayu perancah,
Hunjam masuk penguat iti;
Walau sekejap tuan bermadah,
Begitu menusuk ke dalam hati.

Burung undan burung merpati,
Jalan perlahan antara cerun;
Ucapan tuan tersemat di hati,
Jadi kenangan bertahun-tahun.



The background is a solid yellow color with a repeating pattern of light yellow, ornate floral motifs. These motifs are arranged in a grid, with larger ones at the top and bottom and smaller ones in between. The text is centered in the middle of the page.

Pantun Jemput
Makan

PANTUN JEMPUT MAKAN

Pergi Pekan membeli lokan,
Belilah sudah selonggok peria;
Tuan puan jemputlah makan,
Segala juadah sudah tersedia.

Tepak sirih disinari andang,
Letak di para bersama suasa;
Terima kasih tuan bertandang,
Menjamu selera seenak rasa.

Buah longan buah berangan,
Buah mempelam dalam raga;
Kami sediakan sedikit hidangan,
Buat santapan tetamu semua.

Usah diredah rumput padang,
Rumput panjang terkena bara;
Juadah sudah siap terhidang,
Sudilah tuan menjamu selera.

Padi Malinja banyak hampa,
Tepi hutan tumbuh selasih;
Hidangan saya tidak seberapa,
Tanda ingatan pengikat kasih.

Tulang perdah tajam sekali,
Jangan dibuang dalam paya;
Semua juadah sudah tersaji,
Sudilah tuan nikmati rasanya.

Daun kelapa menimpa kuini,
Pelepah kelapa terkena dada;
Tidak seberapa makanan ini,
Sedap tiada aromanya ada.

Kiranya padi bukannya tuba,
Dalam semak padi direntap;
Kiranya sudi tuan mencuba,
Juadah enak sedia disantap.

Dari Kedah pulang ke Kedah,
Singgah pekan beli berangan;
Bertemu sudah bersapa sudah,
Marilah tuan ke meja hidangan.

Ayam belaan tajam bertaji,
Ayam belanda di tepi huma;
Segala penganan telah tersaji,
Mari kita santap bersama.

PANTUN JEMPUT MAKAN

Telaga ditimba jernihlah juga,
Tepi telaga tumbuhnya meranti;
Juadah hamba tidak seberapa,
Tetapi manisnya menusuk hati.

Dari Melaka hingga ke Pagoh,
Pandu kereta kebaslah tangan;
Buat seketika majlis ditangguh,
Mari kita menjamah hidangan.

Berbunga lebat padinya pulut,
Bendang berair tepian telaga;
Secerach serbat pemanis mulut,
Secawan air penghilang dahaga.

Beli serban di Seri Kembangan,
Beli sejadah di Sungai Tangkas;
Mohon tuan ke meja hidangan,
Menikmati juadah serba ringkas.

Banyak udang banyaklah ikan,
Ikan dipegang dengan sauknya;
Tuan puan dipersilakan makan,
Nasi dihidangkan serta lauknya.

Pekan Inanam singgahlah juga,
Singgah merasa madu kelulut;
Segala penganan di atas meja,
Silalah merasa pemanis mulut.

Kayuh sampan di Sungai Kerian,
Pendayung patah arus berolak;
Tuan puan dipersilakan makan,
Rezeki Allah janganlah ditolak.

Pokok dedap tinggi di awan,
Pohon lemuni dibubuh baja;
Kalau sedap beritahu kawan,
Hidangan kami biasa sahaja.

Tanah pamah di Sungai Besi,
Tanah mendap di paya nipah;
Sudilah jamah hidangan nasi,
Lauknya sedap berkari rempah.

Banyak tebulan dalam semak,
Banyak gelugur di tepi cerun;
Kalaulah jamuan kurang enak,
Mohon ditegur beralas santun.

PANTUN JEMPUT MAKAN

Bukan lokan sebarang lokan,
Lokan sudah dibuangkan isi;
Bukan makan sebarang makan,
Makan juadah masakan sendiri.

Kalau pekan katakan pekan,
Pekan selamat dipenuhi pasir;
Kalau makan katakan makan,
Makan cermat usah membazir.

Dahan serpih dahan tualang,
Bawa mari ke Gunung Tahan;
Makanan lebih usah dibuang,
Mesti disyukuri rezeki Tuhan.

Alang-alang membuat para,
Ambillah seraya di tepi bukit;
Alang-alang menjamu selera,
Simpankan saya walau sedikit.

Kalau pekan katakan pekan,
Pekan Langat dipenuhi pasir;
Kalau makan katakan makan,
Makan cermat usah membazir.

Jangan dikerat ranting dedap,
Ranting pala terjatuh perigi;
Bukan setakat masakan sedap,
Aroma pula harum mewangi.

Pacaklah tiang cantik berlarik,
Pacaklah juga di padang rata;
Wajah riang senyuman melirik,
Juadah tersedia hadapan mata.

Bakarliah arang menjadi bara,
Bakarliah juga di bawah lembah;
Makan seorang hilanglah selera,
Makan bertiga nasi bertambah.

Lautan ini moleklah ditambah,
Ternak gelama dan udang kara;
Masakan ini baunya semerbak,
Cukup perisa cukup berselera.

Berbuah lebat pokok pulasan,
Pulasan Tebrau mari ditayang;
Sungguh hebat masakan puan;
Menghidu bau terasa kenyang.

PANTUN JEMPUT MAKAN

Cucur atap terkena jelaga,
Pelita besi di dalam almari;
Acara santap dimulai juga,
Penuh tradisi majlis berseri.

Sayang gading di dalam selut,
Sayang puan bukannya suasa;
Hanya puding pemanis mulut,
Sudilah puan sudilah merasa.

Air berolak di rumpun nipah,
Mengail keli mengail toman;
Usah ditolak rezeki melimpah,
Hidangan ini elok dihabiskan.

Pokok tuba tumbuh di huma,
Pohon mempelas ada di Papar;
Hidangan hamba sedikit cuma,
Sekadar mengalas perut lapar.



Pantun Pemberi Cenderamata

PANTUN PEMBERI CENDERAMATA

Di Balai Seri berlangsungnya tari,
Tarian putera kakak berjambang;
Cenderahati diberi seikhlas hati,
Tanda mesra mekar berkembang.

Dalam tukir dipenuhi gambar,
Dalam puan diletak penganan;
Senyum terukir manis di bibir,
Hadiah tuan jadikan kenangan.

Petik melur di Jalan Segambut,
Tepi jambatan jalannya kukuh;
Hadiah dihulur mesra bersambut,
Ikatan persahabatan kekal utuh.

Ternak bebiri di Pekan Juasseh,
Tambatlah juga di perdu jati;
Bingkisan diberi tanda kasih,
Simpanlah ia di penjuru hati.

Bukan serkah sebarang serkah,
Serkah terpulas dahan halban;
Bukan hadiah sebarang hadiah,
Hadiah ikhlas bukti keakraban.

Kembang melur tepian hutan,
Kembang selaut meriak bayang;
Hadiah dihulur tanda ingatan,
Moga bertaut kasih dan sayang.

Banyak pelita banyaklah lilin,
Cerah berseri di laman luas;
Sebagai tanda akrab terjalin,
Hadiah diberi dengan ikhlas.

Bunga setaman bunga melati,
Banyak jenis di dalam dulang;
Simpan kenangan dalam hati,
Kenangan manis bawa pulang.

Kampung ini cantiknya lembah,
Kampung Nesam Negeri Perlis;
Cenderamata ini kami persembah,
Tanda kenangan daripada majlis.

Orang Perlis di hujung tanjung,
Orang Kedah bawah berangan;
Sebelum majlis tiba penghujung,
Terimalah hadiah buat kenangan.

PANTUN PEMBERI CENDERAMATA

Pohon jelatang si pohon ara,
Pohon tualang tepian hutan;
Tuan datang disambut mesra,
Tuan pulang diberi bingkisan.

Di sini hujan di sana hujan,
Lebat sekali turun ke lembah;
Di sini pujian di sana pujian,
Pujian diberi berserta hadiah.

Cempedak ini tumbuh di laman,
Pegang seulas jatuh ke bumi;
Cenderamata ini buat kenangan,
Pemberian ikhlas daripada kami.

Lukisan ini objeknya kelapa,
Lukislah rehal barang antik;
Bingkisan ini tidak seberapa,
Tidaklah mahal tetapi cantik.

Membeli kerisi di Pasar Tamu,
Belilah manisan bawa ke rakit;
Adat tradisi melayan tetamu,
Beri bingkisan walaupun sedikit.

Bukan pegaga di tepi hutan,
Tetapi sulur pepohon palas;
Bukan harga menjadi ukuran,
Bingkisan dihulur tanda ikhlas.

Pokok keranji di tepi lembah,
Serkah dahan tertimpa jati;
Kami berjanji memberi hadiah,
Semoga tuan bersenang hati.

Sayang juragan mudik ke hulu,
Keratlah rotan simpan di laci;
Hadiah diberikan bukan selalu;
Lambang ingatan tulus dan suci.

Mengail ikan mengutip kepah,
Bawa umpan bawa minuman;
Tidak dilupakan sedikit hadiah,
Untuk tuan tetamu budiman.

Amatlah payah menaiki rakit,
Tepi pangkalan ditambah juga;
Diberikan hadiah hanya sedikit,
Jadi kenangan sepanjang masa.



PANTUN PEMBERI CENDERAMATA

Tasik Cini di hutan pinggir,
Hutan simpan pokok tualang;
Bingkisan ini hanyalah iringan,
Buah tangan sebelum pulang.



Pantun Persembahan

PANTUN PERSEBAHAN

Duduk tepian merenung kuala,
Kuala Perlis banyaklah gamat;
Majlis kesenian akan bermula,
Moga majlis dilimpahi rahmat.

Batik corakan dedaunan kuini,
Marilah ditekat bebunga lebat;
Tuan dialu-alukan datang ke sini,
Persembahkan bakat yang hebat.

Sungguh rangup mi dan laksa,
Beli seguni bertimbang kati;
Tuan sanggup lapangkan masa,
Datang sini menghiburkan hati.

Dalam talang penuh penganan,
Dibawa orang ke Tanjung Jati;
Tuan datang berlangkah kanan,
Banyak hiburan sedia menanti.

Bunga teratai di tengah paya,
Cantik dibiasi sinar mentari;
Acara bersantai dimulai juga,
Penuh tradisi terpancar seni.

Bawa buah marilah meramu,
Keranjang diisi piring loyang;
Kami bertuah menerima tamu,
Minat tradisi warisan moyang.

Batang bukan sebarang batang,
Batang sekiat di lembah sunyi;
Datang bukan sebarang datang,
Datang melihat tuan menyanyi.

Cantik ungu bentuknya lebar,
Warnanya terpacul dari dekat;
Kami menunggu dengan sabar,
Tuan muncul memperaga bakat.

Kain rami dibentangkan juga,
Coraknya padat sulur-suluran;
Majlis kami sederhana sahaja,
Tetapi sendat dengan hiburan.

Padang rumput jangan disukat,
Luas terbentang banyak tempua;
Tuan dijemput tunjukkan bakat,
Buat persembahan untuk semua.

PANTUN PERSEMAHAN

Dalam puan gambir bertaburan,
Pinang muda pinang direndam;
Silakan tuan tampil ke hadapan,
Keluarkan segala bakat terpendam.

Campak bertabur upih timba,
Upih hutan di Hulu Langat;
Masa berhibur sudahlah tiba,
Giliran tuan pameran bakat.

Anak tani menanam berangan,
Tanamlah temu tepian sawah;
Bakat seni dipersiapkan jangan,
Hiburkan tetamu yang gundah.

Sarat sampan muatan kertas,
Sampan besi tersangkut pukut;
Tuan dipersilakan naik pentas,
Mempamer aksi menunjuk bakat.

Dari Kemaman menuju Pendang,
Dari Jitra ke Wilayah Satun;
Tuan budiman sudi bertandang,
Majlis bermula dengan pantun.

Batang besi punggung ke Pekan,
Besinya berat tersepit ragum;
Bagus sekali persembahan tuan,
Semua khalayak berasa kagum.

Airnya kali melimpah bendang,
Ribut dan taufan hujan menggila;
Manis sekali puan berdongang,
Ayu bersopan hiburan semua.

Kuat bunyinya pintu diumpil,
Pintu bendahara terkena tanjak;
Dengan hormatnya tuan tampil,
Melontar suara membaca sajak.

Manisnya gula dalam karungan,
Merahnya saga dalam sibur;
Tetamu mula bertepuk tangan,
Ramailah juga berasa terhibur.

Kuda ditunggang merentas kali,
Gulungan tangsi melilit ladam;
Persembahan tuan hebat sekali,
Membaca puisi serta gurindam.

PANTUN PERSEMBAHAN

Bukan banir sebarang banir,
Banir medang pinggiran kali;
Bukan syair sebarang syair,
Syair didendang merdu sekali.

Sayang almari hitam berjelaga,
Almari balai Budayawan Bali;
Persembahan tari meriahlah juga,
Lenggok gemalai santun sekali.

Sangat lebat buah pulasan,
Esok dan lusa petiklah nanti;
Cukup hebat penangan tuan,
Kami berasa seronok di hati.

Keledek seguni dibawa balik;
Jalannya mati menuju simpang;
Hiburan begini penuh simbolik,
Bertaut hati mesra berkembang.

Kebun getah di pinggiran hutan,
Dahannya berat letak di sana;
Tamatlah sudah acara kesenian,
Semoga terubat jiwa gulana.



Pantun
Perasmian
Majlis

PANTUN PERASMIAN MAJLIS

Gaharu sebatang susun berlapis,
Wangi menyerlah kalau ditarah;
Tuan datang menyerikan majlis,
Majlis meriah cukup bersejarah.

Sungguh kacang ditimbang kati,
Segarnya kacang direnjis-renjis;
Sungguh kencang debaran hati,
Menunggu tuan rasmikan majlis.

Di tengah lautan jala ditebar,
Dapat selayang juga gelama;
Diharap tuan dapat bersabar,
Majlis perasmian akan bermula.

Angkat rami angkatlah lesung,
Lesungnya berat hiasan tugu;
Majlis rasmi akan berlangsung,
Tuan diharap sabar menunggu.

Apa ubatnya penyakit busung,
Akar kelintang belilah di Pekan;
Apa ertinya majlis berlangsung,
Tanpa tuan datang merasmikan.

Pohon ketapang berdaun lebat,
Rantingnya mati jatuh di sana;
Tuan seorang ilmuwan hebat,
Perasmian nanti lebih bermakna.

Bendang padi dihuni belibis,
Saban hari berbilang-bilang;
Tuan sudi merasmikan majlis.
Majlis berseri cukup gemilang.

Mawar merah di dalam puan,
Lebih berseri jikalau direnjis;
Acara meriah disebabkan tuan,
Datang ke mari rasmikan majlis.

Tikar mengkuang di atas papan,
Ambil selapis simpan di para;
Kami persilakan tuan ke depan,
Rasmikan majlis dengan ceria.

Tapak semaian di Kuala Muda,
Tapak berselut rosak tergilis;
Acara perasmian akan bermula,
Tuan dijemput rasmikan majlis.

PANTUN PERASMIAN MAJLIS

Waktu petang bayu berpuput,
Bagaikan siulan gemersik terasa;
Tuan diundang tuan dijemput,
Tampil ke depan rasmikan acara.

Indah taman di hujung sana,
Taman di Perlis tepian kali;
Tuan budiman bijak laksana,
Rasmikan majlis petah sekali.

Cantiknya binaan anjung seri,
Rumah usang tepi permatang;
Majlis perasmian hilang seri,
Kalau tuan keberatan datang.

Belon udara kembang kempis,
Ditiup bayu melayang-layang;
Sinar gembira menerangi majlis,
Apabila tetamu bersorak riang.

Beli temiang di Negeri Kedah,
Belilah bilis berserta gamat;
Majlis perasmian selesai sudah,
Moga majlis dilimpahi rahmat.

Tulang perdah di atas jerami,
Jerami basah dalam sawah;
Sempurna sudah majlis rasmi,
Majlis meriah terjalin ukhwah.

Dedaun kapuk dedaun sena;
Gugur habis jatuh ke sawah;
Tamu bertepuk gamat suasana,
Perasmian majlis selesai sudah.


Bukan keris sebarang keris,
Keris tempaan Pahlawan Bali;
Bukan majlis sebarang majlis,
Majlis perasmian hebat sekali.

Atas permatang ditanam halia,
Tapak semai di tengah baruh;
Sudah dirasmikan majlis mulia,
Sorak sorai tepukan gemuruh.


Cantik Semporna bandar kami,
Cuaca cerah menimpa sawah;
Sempurna sudah majlis rasmi,
Majlis meriah terjalin ukhwah.



PANTUN PERASMIAN MAJLIS



Jeramikh patah tepi bendang,
Angkat mari ke dalam sampan;
Rasmilah sudah majlis gemilang,
Berjumpa lagi tahun hadapan.





LATAR BELAKANG PENULIS

Mohd Amran bin Daud dilahirkan di Kampung Buloh Poh, Ketereh, Kelantan pada 18 April 1968 dan mendapat pendidikan di Sekolah Menengah Ketereh, sebelum melanjutkan pengajiannya di Universiti Putra Malaysia (1987). Beliau aktif dalam menulis puisi, esei dan cerpen. Kumpulan puisi pertama beliau ialah *Kembali ke Negeri Tradisi* (2002), terbitan Oscar Book International, manakala bukunya berjudul *Puisi 1 Malaysia* (2009) diterbitkan oleh Penerbitan Melur. Antologi puisinya yang lain ialah *Cetera* (1994), *Puyan Jelepek* (1994), *Permata Timur* (1997), *Bulan Barakah* (2000), *Tinta Insan* (2004), *Antologi Sasterawan 2005* (2005), *Ratib Seribu Syair* (2005), *Dari Amerika ke Catatan Langit* (Jakarta, 2006), *Medan Puisi* (Medan, Indonesia 2007), *Kencana* (2008) dan lain-lain. Puisi beliau turut dimuatkan dalam Antologi KOMSAS Tingkatan 2, *Gema Sepi Gadis Genius*, terbitan tahun 2010. Beliau pernah memenangi Hadiah Sastera Utusan Melayu-Public Bank (1994), Hadiah Mengarang Pantun Antarabangsa (1997), Hadiah Puisi Kebangsaan PNB (1999), dan Hadiah Sastera Negeri Kelantan (2003). Selain itu, beliau pernah memenangi pertandingan mendeklamasi sajak, membaca syair dan gurindam. Beliau juga pernah menjadi Editor Buku Teks KOMSAS, *Kerusi*, Bahasa Melayu SRJK Tahun 2 dan Pendidikan Moral Tahun 1. Pernah bertugas sebagai Pegawai Perancang Bahasa di Bahagian Penerbitan Sastera dan kini berkhidmat di Bahagian Pengistilahan dan Leksikologi, Dewan Bahasa dan Pustaka, Kuala Lumpur.



Catatan



JABATAN KEBUDAYAAN DAN KESENIAN NEGARA

Tkt 16, 18, 19, 26, 27, 30 & 34 Menara TH Perdana
Lot 1001 Jalan Sultan Ismail
50250 Kuala Lumpur



03 - 2614 8200



03 - 2697 0884



www.jkkn.gov.my



**SALURAN MEDIA
SOSIAL JKKN**



#MYSENIBUDAYA

MALAYSIA

ISBN 978-967-5552-51-9



9 789675 552519